



26. april 2022

UPA 2022/19

**Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allanngortinneqarnissaannik inatsisissatut siunnersuummut missingiutip (Pinerluttulerinermi eqqartuussisarnermi digitalimik attaveqaatinik atuineq, suliasst nassuernertut suliarineqartut, najuutingitsoornermi eqqartuussutit, eqqartuussisut aamma najukkami eqqartuussisut tunuartussaataanerannut ukioritineqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut. (Aningaasaqarnermut, Aatsitassanut, Inatsisit Atuutsinneqarnerannut Naligiissitaanermullu Naalackersuisoq)**

Siumup isumaa naappertorlugu inuiaat inatsisitigut illersugaanerisa qulakkeersimajuarnissaa pingaaruteqarluinnartuuvoq. Taamaammat Siumut eqqartuussiveqarnerup iluani pitsanngorsaanissanut eqaallisaanissanullu peqataassaaq, taamaaliornikkummi innuttaasut inatsisitigut illersugaaffeqarnerunissaannik sulineq naqissuserneqartussaammat.

Ilisimasatsituut Inatsisinik atuutsitsinermit oqartussaaffik Naalagaaffiup ataani suli inissisimavoq, taamaattumillu suliasanut taakkununga tunngatillugu allannguinnissanik imaluunniit ullutsinnut naleqqussaannissanik siunertaqartoqartillugu Naalagaaffeqatigiinnermi Oqartussaasut saaffigineqartarput suliakkerneqartarlutillu.

Aalajangiiffigisassatullu siunnersuummut matumunnga tunngatillugu taamatuttaaq iliortoqarpoq, tassami siunnersuummi matumani anguniarneqartut qinigaaffiup siulianili aallartisarneqarnikuupput, ilaatigut Kalaallit Nunaanni Eqqartuussiveqarneq pillugu Siunnersuisoqatigiit innersuussuteqartarsimanerisa kingunerisaannik.

Naalackersuisut matumani Eqqartuussisarnermik inatsimmi arlalinnik allannguuteqartitsinissaaq eqaallisaassuteqarnissarlu pillugit saqqummiussaanni qaqilerneqartut Siumumiit iluarisimaarpagut, taamaalillunimi pinerluttulerinermi suliater ingerlasarnerisa naammassiuminarsarneqarnissaat qulakkeerniarneqarmat. Misilittakkammi amerlasuutigut aamma takutittarpaat pinerluttulerinermi inatsimmi unioqqutitsinerpassuit ilaatigut suliasatut annertoorsuurtut taaneqarsinnaanngikkaluit allaat sivoorsuarmik ingerlasinnaasartut, tamannalu illuatungeriinnut, tassalu pinerlineqartumut pinerliisumullu pilertornerusumik pitsaanerumillu atugassaqartitsinissaagaluanut kingunerlussinnaasarluni.

Misilittakkattaq aamma takutittarpaat pinerluuteqarsimasunut suliater eqqarsaatigalugit suliater kinguarsarneqarsinnaasartut unnerluunneqartup suliater inaarsarnerani takkutinngitsoornera takkussinnaajunnaarneraluunniit pissutigalugit, naak piumasaaqatit assigiinngitsut naammassineqareersimagaluartut. Tamanna piumasaaqatitalimmik piumasaaqatinnillu atortikkuminartunik toqqammaveqarnikkut eqqartuussiviit suliater naammassinnissinnaalernissaat anguniarneqarmat Siumumiit iluarisimaarparput. Tamannalu periuseq inuunnaat saqitsaanneranni sulianut atugaasoq ajunngitsumik misilittagaqarfigineqartoq eqqarsaatigalugu Siumumiit immikkut taasaqarfigissallugu naleqquttutut isigaarput.



Suliassaqarfippassuit allat assigalugit digitalimik attaveqaatinik atuinissamik periarfissap eqqunniarneqarnera taamaattussaasariaqartutut isigalugu Siumumiit tapersiissuteqarpugut, taamatuttaaq Kalaallit Nunaanni Eqqartuussisoqarfimmi eqqartuussisut aammalu inatsisilerituut tjenenestemanditut sulisut 65-ileereeraangamik atuuffimminnit unittarnissaannik aalajangersagaq allanngorlugu ukiunut 70-inut periarfissiissuteqarniarneq Siumumiit taperserparputtaa.

Naggataatigut pinerluttulerinermi suliat eqqarsaatigalugit Siumumiit Naalakkersuisunut nassuiaassuteqarfigeqqussavarput matumani kalaallit danskillu eqqartuussisarnermik inatsisaasa assigiinnerulernissaannik anguniagaqarneq arlaatigut immikkut eqqummaariffeqarnissamik maluginiagassartaqarnersoq, tassani danskit pillaasarnermik inatsiseqarnerat aammalu nunatsinni pineqaatissiisarnermik inatsiseqarnerput eqqarsaatigalugit.

Siumumiit taamatut oqaaseqarluta siunnersuut aappassaaneerreqartinnani Inatsisinut ataatsimiititaliami suliarineqarluni pinissaa innersuussutigaarput.

Anders Olsen, Siumut.